

# INUIT ATAQATIGIIT

## Inatsisartuni



2. juni 2021

Inatsisartut Suleriaasianni § 37 imm. 1 naapertorlugu Naalakkersuisunut apequt imaattoq matumuuna saqqummiuppara.

### **Naalakkersuisunut apequt:**

- 1. Namminersorlutik Oqartussanut atuutsinneqartup oqaatillisinnaanermik aqqissuussinerup 2017-imi naliliiffigineqarneranut atatillugu periarfissatut oqaatigineqarpoq, assersuutigalugu ukiut pingasut qaangiunneranni, aqqissuussinerup taassuma naliliffigeqqissinnaanera. Nalileeqqinnissaq pissappat tassunga ilanngullugu oqaatillisinnaanermik aqqissuussinerup suliffeqarfinnut allanut pisortat ingerlatsinerannik suliaqartunut aamma atuutsinneqarsinnaanera eqqarsaatigineqarsinnaasoq oqaatigineqarpoq. Nalilersuinerup nutaap qaqugu piimaarneranik Inatsisartut naatsorsuutiginnissinnaappat?**
- 2. Namminersorlutik Oqartussanut atuutsinneqartoq oqaatillisinnaanermik aqqissuussineq aqqutigalugu nalunaarutigineqartut misissorneqartarnerannut akisussaaffiup Naalakkersuisoqarfiit ataasiakkaat pisortaaneranniit peerlugu assersuutigalugu Intern Revisionimut, oqaatillisarnermik aqqissuussinermik systemitigut aqutsisuussumut, naammattumillu arlaannaannulluunniit pituttorsimanngitsutut inissisimasumut, nuunneqarnissaanik Naalakkersuisut peqquneqarput. UPA2019/81-ip akuerineqarneratigut Inatsisartut peqqusinerat Naalakkersuisunit qanoq malitseqartinneqarpa?**
- 3. Namminersorlutik Oqartussanit pigineqartut ingerlatseqatigiiffiit anginerit ilaqarpat oqaatillisarnermik aqqissuussineramik sulii pilersitsisimanngitsunik?**

(Inatsisartuni ilaasortaq Sofia Geisler, Inuit Ataqatigiit)

### **Tungavilersuut:**

Namminersorlutik Oqartussanut / Naalakkersuisoqarfinnut atuuttoq oqaatillisinnaanermik aqqissuussineq 2015-imi Naalakkersuisunut pilersinneqarpoq. Suliffeqarfimmi namminermi unioqqutitsilluni iliuuseqartoqarneranik ilisimasaqaraanni pasitsaassaqaaraanniluunniit tamanna pillugu nalunaaruteqarsinnaanermik sulisut taamaasillutik periarfissinneqarput. Atornerluineq tassaasinnaavoq akilertilluni iliuuseqarneq, pigisanik atornerluineq pissaanermilluunniit atornerluinerit allat. Aamma tassaasinnaavoq Inatsisartut ilisimasassaannik tunniussinaveersarneq imaluunniit innuttaasut pisinnaatitaaffinnik aqqissuussamik innarliinerit.

Oqaatillisinnaanermik aqqissuussineq 2017-imi naliliiffigineqarpoq.

Naliliinikkut periarfissatut tikkuarneqarpoq, assersuutigalugu ukiut pingasut qaangiunneranni, aqqissuussinerup naliliffigeqqinnissaa, tassungalu atatillugu eqqarsaatigineqarsinnaalluni aqqissuussineq suliffeqarfinnut pisortat ingerlatsinerannut atasunik isumagisaqartunut aamma atuutsinneqarsinnaasoq.

Taamaattumik soqutigalugu paaserusuppara naliliineq nutaaq qanoq pissanersoq Inatsisartut naatsorsuutigisinaaneraat.

Taassuma saniatigut tusarusuppara UPA2019/81 Inatsisartut akuerisaat pillugu Naalakkersuisut maannamut qanoq iliuseqarsimanersut. Tassani pineqarpoq oqaatilliisinnaanermik aaqqissuussineq Namminersorlutik Oqartussanut attuumassuteqartoq aqutigalugu nalunaarutigineqartut suliarineqartanerannut akisussaaffiup Naalakkersuisoqarfiit pisortaanniit peerlugu, assersuutigalugu Intern Revisionimut, oqaatilliisinnaanermik aaqqissuussinerup systemikkut inissisimaffigeriigaanut, aammalu naammattumik arlaannaannulluunniit pituttorsimangitsutut inissisimasumut, nuunneqarnissaanut Naalakkersuisut pisussaaffilerneqarnerat.

Naggataatigullu paaserusuppara Namminersorlutik Oqartussanit pigineqartut ingerlatseqatigiiffiit anginerit ilaqarnersut oqaatilliisinnaanermik aaqqissuussinernik suli pilersitsisimangitsunik. Tassunga tunngatillugu innersuussutigissavara UPA2019/140, tassuunakkut Naalakkersuisut peqquneqarmata ingerlatseqatigiiffinni Namminersorlutik Oqartussanit pigineqartuni oqaatilliisinnaanermik aaqqissuussinernik atuilernissamut Naalakkersuisut sulissuteqaqqullugit. Siunnersuutip taassuma akuerineqarnerata nalaani taamaallaat Air Greenland aamma KNI aaqqissuussinermik tassanga atuilersimapput. Tele Greenland atuutsitsilernissamik suliaqarluni, Royal Arctic Line aamma Royal Greenland atuutsitsilernissamik eqqarsaatersuuteqartut.

Kissaatigivara apeqqutikka ullut suliffiusut qulit qaangiutinnginneranni akineqarnissaat.